

Na temelju člana \_\_\_\_\_ stav 5. Zakona o poticanju razvoja male privrede („Službene novine Federacije BiH“, br. \_\_\_\_\_), Vlada Federacije Bosne i Hercegovine, na sjednici održanoj \_\_\_\_\_ 2021. godine, donosi:

**UREDBU**  
**O PROVOĐENJU POSTUPKA PROCJENE UČINAKA PROPISA NA RAZVOJ MALE PRIVREDE**

**Član 1.**  
**(Predmet)**

Ovom uredbom uređuju se pravila za provođenje postupka procjene učinaka propisa na razvoj male privrede, odnosno bliži kriteriji, metodologija i obrasci po kojima se izrađuje test male privrede (u daljnjem tekstu MSP test) i način provođenja konsultacija u postupcima uređenim ovom uredbom.

**Član 2.**  
**(Primjena)**

Ova uredba odnosi se na prednacte i nacрте zakona, te na provedbene akte (uredbe i pravilnike) koje donosi Vlada Federacije Bosne i Hercegovine (u daljnjem tekstu Vlada Federacije), federalna ministarstva, federalne uprave i federalne upravne organizacije kao nosioci izrade propisa.

**Član 3.**  
**(Načela)**

MSP test se u postupku donošenja akata iz člana 1. ove uredbe provodi primjenom sljedećih načela:

- a) Načelo administrativnog pojednostavljenja - obveze i zahtjevi prema subjektima male privrede moraju sadržavati što nižu razinu administrativnih troškova i uslova za pristup tržištu.
- b) Načelo proporcionalnosti - propisane obaveze i zahtjevi prema subjektima male privrede moraju biti srazmjerni svojoj svrsi kako bi se u opravdanoj mjeri ostvarila zaštita javnog interesa.

**Član 4.**  
**(Podaci za procjenu)**

(1) Nosilac izrade propisa je dužan za utvrđivanje činjenica i podataka koji će poslužiti kao polazna osnova i podloga za procjenu učinaka propisa na subjekte male privrede koristiti mjerodavne izvore službenih podataka nadležnih institucija Federacije BiH, kao i naučno-istraživačkih i obrazovnih institucija, nevladinih organizacija, međunarodnih organizacija, poslovnog sektora, i sl.

(2) Osim izvora podataka iz stava 1. ovog člana, nosilac izrade propisa može, u svrhu utvrđivanja činjenica i podataka koji će poslužiti kao polazna osnova i podloga za procjenu učinaka propisa, koristiti i druge relevantne izvore podataka iz odgovarajućih institucija EU i odgovarajućih međunarodnih organizacija i institucija.

**Član 5.**  
**(Provođenje MSP testa)**

(1) MSP test se provodi po metodologiji skraćene procjene uticaja propisa i sveobuhvatne procjene uticaja propisa.

**Član 6.**  
**(Kriteriji za provođenje skraćenog MSP testa)**

(1) Skraćeni test male privrede (u daljnjem tekstu Skraćeni MSP test) provodi se u pripremi pravilnika predviđenih zakonima koji su sadržani u Godišnjem planu rada Vlade Federacije, odnosno za koje je Vlada Federacije odlučila da će se provesti sveobuhvatna procjena uticaja propisa, u skladu sa propisima kojim se uređuje procjena učinaka propisa.

(2) Skraćeni MSP test se provodi u pripremi svih uredbi koje donosi Vlada Federacije.

(3) Skraćeni MSP test se provodi u skladu sa ovom uredbom i kriterijima sadržanim u obrascu iz Aneksa 1. ove uredbe.

**Član 7.**  
**(Očekivani učinci)**

Očekivani učinci propisa iz člana 2. ove uredbe procjenjuju se kroz učinke na sektor male privrede, prema sljedećim kriterijima:

- utvrđivanje ciljane skupine/podskupine
- zapošljavanje i samozapošljavanje u subjektima male privrede
- tržišno natjecanje i konkurentnost

- administrativni trošak primjene propisa za subjekte male privrede
- učinak na mikro subjekte male privrede
- privredni i finansijski rezultat poslovanja malih i srednjih subjekata male privrede
- drugi očekivani učinci na sektor male privrede ukoliko su ocijenjeni značajnima.

#### **Član 8.**

##### **(Izrada skraćenog MSP testa)**

- (1) Nosilac izrade propisa izrađuje Skraćeni MSP test na način da se ispunjava obrazac za Skraćeni MSP test iz Aneksa 1. ove uredbe.
- (2) Obrazac Skraćenog MSP testa iz stava 1. ovog člana dostavlja se na analizu i kvalitativnu kontrolu Federalnom ministarstvu razvoja, poduzetništva i obrta Federacije Bosne i Hercegovine (u daljnjem tekstu: Ministarstvo) zajedno s nacrtom propisa.
- (3) Ministarstvo na osnovu analize iz stava (2) ovog člana može u roku od osam dana od dana dostave Skraćenog MSP test, nosiocu izrade izdati mišljenje o potrebi provođenja sveobuhvatnog testa male privrede.

#### **Član 9.**

##### **(Sveobuhvatni test male privrede)**

- (1) Izrada sveobuhvatnog MSP testa je obavezna u postupcima donošenja pravilnika predviđenih zakonima koji su sadržani u Godišnjem planu rada Vlade Federacije, odnosno za koje je Vlada Federacije odlučila da će se provesti sveobuhvatna procjena uticaja propisa, u skladu sa propisima kojim se uređuje procjena učinaka propisa, ako se kroz Skraćeni MSP test utvrdi učinak na subjekte male privrede, prema najmanje dva utvrđena kriterija iz člana 7. ove uredbe.
- (2) Izrada sveobuhvatnog MSP testa je obavezna, ako se u postupku donošenja uredbi, kroz Skraćeni MSP test utvrdi učinak na subjekte male privrede, prema najmanje dva utvrđena kriterija iz člana 7. ove uredbe.
- (3) Sveobuhvatni MSP test se može provesti na osnovu mišljenja Ministarstva iz člana 8. stav (3) ove uredbe.

#### **Član 10.**

##### **(Izrada sveobuhvatnog MSP testa)**

- (1) Nosilac izrade propisa pristupa izradi Prijedloga sveobuhvatnog MSP testa (u daljnjem tekstu: Prijedlog MSP testa) prikupljanjem odgovarajućih podataka i provođenjem konsultacija s nadležnim tijelima državne uprave, socijalnim partnerima: reprezentativnim udruženjem

poslodavaca i reprezentativnim sindikatom i zainteresovanom javnošću, ovisno o upravnom području u kojem izrađuje propis.

(2) Prijedlog MSP testa nosilac izrade propisa izrađuje prema zahtjevima utvrđenim u obrascu sadržanom u Aneksu 2. ove uredbe.

(3) O Prijedlogu MSP testa i nacrtu prijedloga propisa nosilac izrade propisa provodi obavezne konsultacije sa socijalnim partnerima: reprezentativnim udruženjem poslodavaca i reprezentativnim sindikatom, te konsultacije sa zainteresiranom javnošću u skladu sa odredbama čl. 78.-86. Pravila i postupaka za izradu zakona i drugih propisa Federacije Bosne i Hercegovine („Službene novine Federacije BiH“, broj 71/14) i Uredbom o pravilima za učešće zainteresirane javnosti u postupku pripreme federalnih pravnih propisa i drugih akata („Službene novine Federacije BiH“, broj 51/21).

(4) Nosilac izrade propisa ažurira Prijedlog MSP testa i nacrt prijedloga propisa u skladu s primjedbama, prijedlozima i mišljenjima usvojenim u postupku konsultacija iz stava 3. ovog člana.

(5) Ažurirani Prijedlog MSP testa i nacrt prijedloga propisa nosilac izrade propisa dostavlja na analizu, kvalitativnu kontrolu i mišljenje Ministarstvu.

(6) Ministarstvo je dužno svoje mišljenje dostaviti u roku od 15 dana.

(7) Nakon pribavljanja mišljenja iz stava 5. ovog člana nosilac izrade propisa nastavlja s postupkom u skladu s propisima kojima se uređuje procjena učinaka propisa.

#### **Član 11. (Informisanje)**

(1) Informisanje o održavanju konsultacija o Prijedlogu MSP testa provodi se prema obrascu sadržanom u Aneksu ove uredbe.

(2) Nakon provedenih konsultacija, nosilac izrade bilježi sve primjedbe, prijedloge i mišljenja učesnika, dostavljene na odgovarajući način, te ih je dužan razmotriti.

(3) Obrazloženje prihvaćenih i neprihvaćenih primjedbi, prijedloga i mišljenja nosilac izrade će objaviti u formi izvještaja koji će biti dostupan na internet stranici nosioca izrade propisa i internet stranici Vlade Federacije.

#### **Član 12. (Stupanje na snagu)**

Ova uredba stupa na snagu osmoga dana od dana objave u „Službenim novinama Federacije BiH“.